

LO NA PASIN BILONG MISA

TOK WELKAM

Pris: Long nem bilong Papa, na bilong Pikinini, na bilong Holi Spirit.
Ol: Amen.

A. **Pris:** Bikpela, Jisas Krais, i ken marimari long yupela, God i ken sori long yupela, na Holi Spirit i ken i stap wantaim yupela olgeta.
Ol: Na wantaim spirit bilong yu.

B. **Pris:** Lord i stap wantaim yupela.
Ol: Na wantaim spirit bilong yu.

C. **Pris:** God, Papa bilong yumi, wantaim Bikpela, Jisas Krais, em i ken marimari long yupela, nab el isi bilong em i ken i stap wantaim yupela.
Ol: Na wantaim spirit bilong yu.

LOTU SORI

Pris: Ol bratasusa, nau yumi autim sori long ol sin bilong yumi long God Papa, bai yumi redi gut long mekim dispela misa.

Ol: Mi tokaut long God i strong olgeta, na long yupela, ol bratasusa. Mi bin mekim planti sin tumas, long tingting, long toktok, long pasin nogut mi bin mekim, na long ol gutpela wok mi les long mekim.

Ol i paitim bros bilong ol, na ol i tok:

Tru, i rong bilong mi, i rong bilong mi, i bikpela rong bilong mi. olsem na mi askim Santu Maria, i Virgo oltaim, olgeta ensel na santu, na yupela ol bratasusa, yupela pre, bai God i marimari long mi. amen.

Pris i pre, bai God i lusim sin bilong em na bilong ol manmeri wantaim:

Pris: God i strong olgeta, i ken marimari long yumi, na i ken tekewe ol sin bilong yumi, na i ken bringim yumi long laip bilong oltaim.

Ol: Amen.

I gat ol arapela pre bilong sori.

Pris: Yu kam bilong oraitim ol manmeri i sori long sin bilong ol.
Lord, yu marimari.

Ol: Lord, yu marimari.

Pris: Yu kam bilong singautim bek ol manmeri bilong sin.
Krais, yu marimari.

Ol: Krais, yu marimari.

Pris: Yu sindaun long raithan bilong Papa, nay u pre bilong helpim mipela.
Lord, yu marimari.

Ol: Lord, yu marimari.

Pris: God i strong olgeta i ken marimari long yumi, na i ken tekewe ol sin bilong yumi, na i ken bringim yumi long laip bilong oltaim.

Ol: Amen.

0

Pris: Ol bratasusa, nau yumi autim sori long ol sin bilong yumi long God Papa, bai yumi redi gut long mekim dispela misa.

Pris: Jisas, yu kam bilong bringim bel isi bilong God long olgeta manmeri. Lord, yu marimari.

Ol: Lord, yu marimari.

Pris: Yu kam bilong strongim mipela long tok na long sakramen bilong yu. Krai, yu marimari.

Ol: Krai, yu marimari.

Pris: Bai yu kam bek gen wantaim bikpela bilas bilong yu, nay u oraitim ol manmeri bilong yu. Lord, yu marimari.

Ol: Lord, yu marimari.

Pris: God i strong olgeta i ken marimari long yumi, na i ken tekewe ol sin bilong yumi, na i ken bringim yumi long laip bilong oltaim.

Ol: Amen.

LORD, YU MARIMARI

Nau ol i pre: “Lord, yu marimari,” sapos ol i no bin mekim wantaim ol dispela arapela pre sori.

Pris: Lord, yu marimari. Ol: Lord, yu marimari.

Pris: Krai, yu marimari. Ol: Krai, yu marimari.

Pris: Lord, yu marimari. Ol: Lord, yu marimari.

Ol i sing o pre, “Ona long God i stap antap” long ol Sande, na long ol Pestode. Tasol long ol Sande bilong Atven na Len nogat.

Pris: Ona long God i stap antap,

Ol: na long graun gutpela taim long ol manmeri, God i laikim ol tumas. Lord God, yu King bilong heven, yu Papa i strong olgeta. Mipela i tok amamas long yu. Mipela i adorim yu. Mipela i litimapim nem bilong yu. Mipela i tenkim yu long bikpela bilas bilong yu.

Lord Jisas Krai, yu wanpela tasol i Pikinini bilong God. yu Lem bilong God i tekewe olgeta sin, marimari long mipela. Yu tekewe olgeta sin, harim pre bilong mipela. Yu sindaun long raithan bilong God Papa, marimari long mipela.

Lord Jisas KRais, yu tasol yu holi, yu tasol, yu Lord. Yu tasol, yu antap tru. Na wantaim Holi Spirit, yu stap long bilas bilong God Papa. Amen.

Taim singsing o pre ona i pinis, pris i mekim pre bilong begin:

Pris: Yumi pre:

Ol: Amen.

LOTU BILONG TOK BILONG GOD

RIT NAMBA WAN

Nau man o meri bilong ritim tok bilong God i go long ples bilong rit, na em i ritim namba wan rit. Olgeta manmeri i sindaun na harim tok bilong God.

Taim rit i pinis, man o meri i bin rit, em i tok:

Rida: Dispela em i tok bilong God.

Ol: Yumi tenkim God.

Rida, o man/meri bilong lidim singsing i pre o singim sam na olgeta manmeri i bekim.

RIT NAMBA TU

Sapos i gat namba tu rit, man o meri bilong ritim tok bilong God i mekim wankain tasol.

ALELUYA. WELKAMIM GUTNIUS

Nau olgeta i singsing o pre: “Aleluya.” Long Len i gat narapela singsing, olsem lo bilong lotu i tok. Ol i ken wokim Gutnius Prosesio nau, sapos ol i laik. Long Gutnius Prosesio yumi onarim Krais em i Tok bilong God. (Yumi i no onarim Buk bilong Gutnius o Buk Baibel.) wanwan peris na haus lotu i mas i gat Buk bilong Gutnius bilong wokim dispela Gutnius Prosesio stret.

GUTNIUS

Sapos i gat bikpela pestode, nau pris i ken putim insens. Em i putim pinis, orait, diken husat bai i ritim Gutnius i daunim het, na i askim pris (bisop) long blesim em:

Diken: Papa, yu blesim mi.

Pris: God i ken pulapim tingting na toktok bilong yu wantaim strong bilong em, bai yu inap tokaut gut long Gutnius bilong em. Long nem bilong Papa, na bilong Pikinin, na bilong Holi Spirit.

Diken: Amen.

Sapos i no gat diken, pris yet i daunim het, i tanim pes i go long alta, na em i tok isi:

Pris: God, yu strong olgeta, stretim tingting na maus bilong mi, bai mi inap tokaut gut long Gutnius bilong yu.

Nau diken (o pris) i go long ples bilong ritim Gutnius. Ol i ken karim insens na kendel i go wantiam. Diken (o pris) i tok o sing:

Diken/Pris: Harim Gutnius bilong Jisas Krais, N. i raitim.

Na em i mekim mak bilong kruse long Buk bilong Gutnius, long poret, long maus na long bros bilong em. Na olgeta manmeri tu i mekim mak bilong krus long poret, maus na bros bilong ol.

Ol: Ona long yu, Lord.

Long pestode, diken (o pris) i givim insens long Buk bilong Gutnius. Bihain em i tokaut long Gutnius. Ritim Gutnius pinis, diken o pris i tok o sing:

Diken/Pris: Dispela em i Gutnius bilong Jisas Krai.

Ol: Ona long yu, Krai.

Diken (o pris) i givim kis long Buk bilong Gutnius, na i tok:

Diken/Pris: Long tok bilong Gutnius God i ken lusim ol sin bilong yumi.

SKUL LONG TOK BILONG GOD (HOMILI)

Long ol Sande na pestode pris (diken) i mas givim skul long tok bilong God. i gutpela, em i givim liklik skul long ol arapela de tu.

TOK BILIP BILONG NAISIA

*Taim skul i pinis, orait, long ol Sanden a Bikpela Pestode olgeta i autim “**Tok Bilip.**” Em i orait long autim “**Tok Bilip**” tu sapos i gat bikpela pestode long peris o ples.*

Pris: Mi bilong long God wanpela tasol.

Ol: Long God Papa i strong olgeta. Em i mekim kamap heven na graun, olgeta samting mipela i save lukim, na olgeta samting mipela i no save lukim. Mi bilip long Bikpela, Jisas Krai, em wanpela tasol i Pikinini bilong God. Long taim olgeta samting i no kamap yet, em i stap wantaim Papa. Em i God, i kamap long God. Em i lait, i kamap long lait, na em i God tru, i kamap long God tru. Em i kisim laip long God Papa, na i no gat wanpela i bin kamapim em. Em i wankain tru olsem Papa. Long em olgeta samting i bin kamap. Em i laik kisim bek olgeta manmeri, na em i kam daun long heven.

*Nau olgeta i daunim het inap long tok: “**na i karim em.**”*

Long strong bilong HOLi Spirit Maria Virgo i kisim bel, na i karim em. Long taim bilong Ponsius Pailat ol i nilim em long diwai kros, na em i karim pen bilong kisim bek mipela. Em i dai, na ol i planim em. Long de namba tri em i kirap bek olsem Baibel i tok. Em i go bek long heven, na i sinduan long raithan bilong Papa. Bihain bai em i kam bek gen wantaim bikpela bilas, bilong mekim kot long ol i stap yet, na long ol i dai pinis. Na kingdom bilong em i no inap pinis. Mi bilip long HOLi Spirit, em i bikpela, na em i save givim laip. Em i kamap long Papa wantaim Pikinini. Mi adorim na onarim em wantaim Papa na Pikinini. Em i bin autim tk long maus bilong ol profet. Mi bilip long Sios i wanpela, na i holi, na i katolik, na i kam long ol aposel. Mi bilip long wanpela baptais bilong pogivim sin. Mi wet long kirap bilong ol manmeri i dai pinis, na long laip i kamap binain. Amen.

TOK BILIP BILONG OL APOSEL

I gat wanpela narapela “Tok Bilip,” ol i kolim “Tok Bilip bilong ol Aposel” i ken kisim ples bilong Tok bilip bilong Naisia. Ol i autim “Tok Bilip” long ol Sanden a ol Blkpela Pestode. Na ol i ken autim tru long bikpela pestode bilong peris o ples. I gutpela long yusim dispela Tok bilip bilong ol Aposel long taim bilong Len na long taim bilong Ista.

Pris: Mi bilip long God Papa i stong olgeta.

Ol: em i mekim kamap heven na graun. Mi bilip long Jisas Krai, em wanpela tasol i Pikinini bilong God. Em i Bikpela bilong yumi.

Nau olgeta i daunim het inap long tok: “i karim em.”

Long strong bilong Holi Spirit, Maria Virgo i kisim bel, na i karim em. Long taim bilong Ponsias Pailat em i karim pen. Ol i nilim em long diwai kros. Em i dai na ol i planim em. Em i go long ples bilong ol i dai pinis. Long de namba tri em i kirap bek. Em i go bek long heven. Em i sindaun long raithan bilong God Papa i strong olgeta. Bihain bai em i kam bek gen bilong mekim kot long ol i stap yet, na long ol i dai pinis. Mi bilip long Holi Spirit, long Sios i holi na i Katolik, long ol santu i wanfamili tasol, long God i pogivim sin, i kirapim bodi, na i givim laip bilong oltaim. Amen.

PRE BILONG PIPEL BILONG GOD

Nau ol i mekim dispela pre ol i kolim: “Pre bilong Pipel bilong God.” Ol i mekim pre askim tasol, na ol pre i mas sotpela. No ken stori o givim skul insait long pre. I gutpela, ol i mekim 5 o 6 pre askim tasol.

LOTU BILONG YUKARIS

Taim dispela ol pre i pinis, ol i ken kirapim song bilong redim ofa. Long dispela taim tu ol i stretim alta na putim corporal, klos bilong klinim kalis, kap bilong wain na buk bilong misa antap long alta. Ol i mas redim inap hostia (na wain) bilong olgeta manmeri husat i laik kisim komunio. Long wanem, em i gutpela tru, sapos ol bilipmanmeri i kisim Bodi (na Blut) bilong Krai long hostia (na wain), em pris i bin blesim long dispela misa yet. Sapos oli mekim olsem, bai ol bilipmanmeri inap pilim olsem, long komunio ol i bung wantaim ofa, Krai i givim long God Papa.

Pris: Ona i go long yu, God bilong heven na graun. Yu save givim olkain gutpela samting long mipela. Nau mipela i bringim long yu dispela bret i kamap long graun na long wok bilong ol manmeri. Bai i kamap bret bilong givim laip long mipela.

Ol: Ona long yu, God. Ona long yu oltaim.

Diken (o pris yet) i kapsaitim wain long kap na liklik wara tu, na em i tok isi:

Dispela wara i bung wantaim wain, em i mak bilong yumi i bung wantaim Krai. Krai yet i bin kamap man, na em i bin kisim laip bilong yumi. Na nau yumi kisim laip bilong God.

Pris: Ona i go long yu, God bilong heven na graun. Yu save givim olkain gutpela samting long mipela. Nau mipela i bringim long yu dispela wain, i kmaap long rop wain na long wok bilong ol manmeri. Bai i kamap dring bilong givim laip long mipela.

Ol: Ona long yu, God. Ona long yu oltaim.

Nau pris i daunim het tru, na em i tok isi:

Pris: God Papa, mipela i daunim mipela yet, na mipela i sori long ol sin bilong mipela. Olsem na mipela i askim yu, yu ken amamas long dispela ofa, nau mipela i bringim i kam long yu.

Sapos i gat pestode, pris i givim insens long ofa na long alta na long kruse. Bihain diken o ministran i givim insens long pris na long ol bilipmanmeri.

Nau pris i sanap arere long alta, i wasim han na em i tok isi:

Pris: Ol bratasusa, yupela pre, bai God Papa, i strong olgeta, i ken laikim dispela ofa bilong mi na bilong yupela.

Ol: Bikpela i ken kisim dispela ofa long han bilong yu bilong litimapim nem bilong em, na bilong helpim mipela na holi Sios bilong em.

Nau pris i opim na litimapim han long pre, na em i mekim pre bilong ofa. Pre i pinis, olgeta i tok:

Ol: Amen.

BIKPELA PRE TENKYU

Nau pris i kirapim Bikpela Pre Tenkyu. Em i opim han, na em i tok o sing:

Pris: Lord i stap wantaim yupela

Ol: Na wantaim spirit bilong yu.

Pris: Litimapim hat bilong yupela

Ol: Mipela i litimapim long Lord.

Pris: Yumi tenkim God, i Lord bilong yumi

Ol: Em i gutpela na i stret.

Nau pris i pre o singim prefasio. Prefasio, pris i pasim han na wantaim olgeta manmeri em i pre o singim: "Holi, Holi, Holi."

Holi, Holi, Holi Lord. God yu strong olgeta. Heven na graun i pulap long bilas bilong yu. Hosana long God i stap antap. Litimapim nem bilong em i kam long nem bilong Lord. Hosana long God i stap antap.

Oltaim pris i mas autim klia na stret olgeta pre bilong Bikpela Pre Tenkyu, bai ol manmeri inap harim gut. Sapos em i laik, pris i ken singim sampela hap bilong Bikpela Pre Tenkyu.

BIKPELA PRE TENKYU 1

God Papa, mipela i kam long yu long nem bilong Jisas Krai, Pikinini bilong yu, na Bikpela bilong mipela. Na mipela i askim yu, kisim dispela ofa, i holi tru, na blesim dispela presen, mipela i givim long yu, bilong helpim Sios bilong yu, em i holi na i Katolik. Was long em, stiaim em, na givim gutpela taim long em, na mekim em i kamap wanfamili long olgeta hap bilong graun, wantaim Pop N., na Bisop bilong mipela N., na olgeta manmeri i holim bilip Katolik i kam long ol aposel.

(Wanpela pris tasol i pre).

God Papa, tingim ol dispela manmeri N., N., nau mipela i laik helpim ol long dispela ofa. God Papa, tingim tu mipela olgeta i kam i stap hia. Yu save, mipela i bilip long yu, na mipela i laik holim wok bilong yu tasol. Mipela i givim dispela ofa bilong litimapim nem bilong yu, na bilong helpim mipela na olgeta lain bilong mipela, bai mipela olgeta i ken i stap gut, na bai mipela i ken kamap long ples bilong yu.

(Wanpela pris tasol i pre).

Long dispela ofa mipela olgeta lain bilong Sios i tingim na litimapim nem bilong ol santu. * Pastaim mipela i litimapim nem bilong Santu Maria, i Virgo oltaim, na Mama bilong Jisas Krai, God na Bikpela bilong mipela. Mipela i litimapim nem bilong Santu Josep, man bilong em, na bilong ol santu aposel na martir bilong yu. Pita na Pol, na Endru, (Jems na Jon, Tomas, Jems na Filip, Batolomiu, Matyu, Saimon na Tadius, Lainus, Klitus, Klemens, Sikstus, Konelius, Siprian, Lorens, Krisogonus, Jon na Pol, Kosmans na Demian) na olgeta santu. Papa, tingim ol gutpela wok na pre bilong ol, na helpim mipela oltaim. (Long nem bilong Krai, em i Bikpela bilong mipela. Amen.)

** TINGIM SAMPELA BIKPELA PESTODE*

Krismas na wik bihain long Krismas.

Long dispela ofa mipela olgeta lain bilong Sios i singsing amamas long dispela de (nait) holi, taim Santu Maria, i Virgo oltaim, i karim Jisas Krai, Ridima bilong mipela. Mipela i tingim tu na litimapim nem bilong ol santu.*

Pestode bilong Tri King

Long dispela ofa mipela olgeta lain bilong Sios i singsing amamas long dispela de holi bilong Tri King. Jisas, Pikinini bilong yu, em oltaim i stap long bilas wantaim yu, nan au em i kamap man na i kisim bodi olsem mipela. Na em i kamap ples klia long ai bilong olgeta manmeri. Mipela i tingim tu na litimpaim nem bilong ol santu.*

De i go pas long Ista inap long Sarere bihain long Ista.

Long dispela ofa mipela olgeta lain bilong Sios i singsing amamas long dispela de (nait) holi, taim Jisas Krai, Bikpeal bilong mikpela, i kirap long matmat. Mipela i tingim tu na litimapim nem bilong ol santu.*

Pestode bilong Jisas i go bek long heven. (Asensio)

Long dispela ofa mipela olgeta lain bilong Sios i singsing amamas long dispela de holi, taim Jisas, Pikinini bilong yu na Bikpela bilong mipela, i go bek long bilas bilong heven, na i sindaun long raithan bilong yu. Mipela i tingim tu na litimapim nem bilong ol santu.*

Pestode bilong Pentikos

Long dispela ofa mipela olgeta lain bilong Sios i singsing amamas long dispela de holi bilong Pentikos, taim Holi Spirit i kamdaun long ol aposel long mak bilong tang bilong paia. Mipela i tingim tu na litimapim nem bilong ol santu.

God Papa, mipela i askim yu, kisim dispela ofa bilong mipela olgeta famili bilong yu. Givim gutpela taim long mipela hia long graun. Lukautim mipela, nogut mipela i lus olgeta. Kisim mipela i go i stap wantaim lain bilong yu long heven. (Long nem bilong Kraiss, em i Bikpela bilong mipela. Amen.)

De i go pas long Ista inap long Sarere bihain long Ista.

God Papa, mipela i askim yu, kisim dispela ofa bilong mipela olgeta famili bilong yu, mipela i givim long yu bilong helpim ol dispela lain i kamap nupela long wara na long Holi Spirit, na yu bin lusim sin bilong ol. Givim gutpela taim long mipela hia long graun, lukautim mipela, nogut mipela i lus olgeta. Kisim mipela i stap wantaim lain bilong yu long heven. (Long nem bilong Kraiss, em i Bikpela bilong mipela. Amen.)

(Olgeta pris wantaim i pre)

God Papa, mipela i askim yu, blesim dispela ofa, luksave long en na tok orait long en, na mekim em i gutpela na i stret long ai bilong yu, bai em i kamap Bodi na Blut bilong Pikinini bilong yu, Jisas Kraiss, em i Bikpela bilong mipela.

Pris i mas autim klia na stret ol tok i kamap nau, bai olgeta manmeri i stap long Misa i ken harim gut, na tingim dispela tok i tok bilong Kraiss yet.

Long nait i go pas long em i dai, Jisas i kisim bret long han holi bilong em, em i lukluk long heven, long yu, God Papa. Em i tenkim yu na litimapim nem bilong yu. Em i brukim bret, em i givim long ol disaipel bilong em, na em i tok:

YUPELA OLGETA, KISIM NA KAIKAI LONG EN. DISPELA EM I BODI BILONG MI. BAI MI GIVIM BILONG ORIATIM YUPELA.

Na long wankaim pasin, taim ol i kaikai pinis, Jisas i kisim kap i gat wain long han holi bilong em. Em i tenkim yu na i litimapim nem bilong yu gen. Em i givim kap long ol disaipel bilong em, na em i tok:

YUPELA OLGETA, KISIM NA DRING LONG EN. DISPELA EM I KAP BILONG BLUT BILONG MI. EM I BLUT BILONG NUPELA KONTRAK I STAP OLTAIM.

DISPELA BLUT BAI I LUS BILONG TEKEWE SIN BILONG YUPELA NA BILONG PLANTI MANMERI. YUPELA MEKIM OLSEM BILONG TINGIM MI GEN.

Nau pris i sing (tok):

Pris: Nau yumi telimautim bilip bilong yumi

Ol: Krais, yu dai. Krais, yu kirap bek. Krais, bai yuk am bek gen.

O

Ol: Lord, mipela i tokaut long indai bilong yu, na mipela i autim bilip long kirap bilong yu, inap long taim yu kam bek.

O

Ol: Lord, olgeta taim mipela i kaikai dispela bret, na dring long dispela kap, mipela i telimautim indai bilong yu, inap long taim yu kam bek.

O

Ol: Lord, yu Ridima bilong mipela, yu oraitim mipela pinis long indai na kirap bilong yu. Helpim mipela nau.

(Olgeta pris wantaim)

God Papa, nau mipela i tingting long Jisas Krais, em i Pikinini bilong yu na Bikpela bilong mipela. Mipela, holi pipel bilong yu, wantaim ol lain i holim wok bilong yu, mipela i tingting gen long Jisas i karim pen, i kirap long indai, na i go bek long heven.

God Papa, yu bin givim olgeta gutpela samting long mipela. Na long dispela presen bilong yu, nau mipela i givim long yu dispela ofa, em i holi, na em i gutpela, na em i klin olgeta. Dispela bret i save givim laip, na dispela kap i save kisim bek mipela.

Lukdaun long dispela gutpela ofa. Kisim em, olsem bipo yu bin kisim ofa bilong Ebel, em i stretpela man, na ofa bilong Abraham, em i man bilong bilip, na ofa bilong Melkisedek, em i pris bilong yu.

God Papa, yu strong olgeta, mipela i askim yu, salim ensel bilong yu i ringim dispela ofa bilong mipela i go long alta bilong yu long heven. Mipela i laik kisim Bodi na Blut bilong Jisas, Pikinin bilong u, long dispela alta hia, na mipela i pre, bai yu pulapim mipela long olgeta grasia na blesing bilong yu. (Long nem bilong Krais, em i Bikpela bilong mipela. Amen.)

Papa, tingim ol manmeri i dai pinis, nau mipela i laik pre bilong helpim ol, N., na N.,. Ol i bin i go pas long mipela. Ol i bilip long yu nan au ol i malolo.

(Pris, ol pipel yet i ken kolim nem). **Mipela i aksim yu, Papa, bringim ol idspela manmeri, wantaim olgeta bilipmanmeri ui dai pinis, i go long ples, yu bin promisim ol, dispela ples bilong lait na bilong gutpela taim wantaim yu. (Long nem bilong Krais, em i Bikpela bilong mipela. Amen.)**

(Wanpela pris tasol i pre)

Mipela, pipel bilong yu, mipela tu i wetim bikpela marimari bilong yu. Mipela i pre, bai mipela i ken i stap wantaim ol santu aposel na martir bilong yu. Jon bilong Baptais, Stiven, Mataias, Banabas, Ignasius, Aleksanda,

Maselinus, Pita, Felisiti, Pepetua, Agata, Lusi, Agnes, Sesilia, Anastasia) na wantaim olgeta santu bilong yu. Tru mipela i manmeri bilong sin. Tasol mipela i wetim marimari bilong yu. Yu no ken skelim ol wok bilong mipela, tasol yu ken pogivim ol sin bilong mipela, na kisim mipela tu i go i stap wantaim ol. Long nem bilong Krais, emi Bikipela bilong mipela.

(Pris i go pas long misa i pre)

Mipela i askim ol dispela samting long nem bilong Krais, em i Bikipela bilong mipela. Long em tasol yu oltaim mekim ol dispela samting hia i kamap gutpela, na i kamap holi. Long Krais tasol yu blesim mipela, na yu givim laip long mipela.

Em i kisim kalis na plet wantaim hostia na litimapim tupela wantaim, na em i sing (tok):

Pris: Dispela Jisas Krais, long wok bilong Holi Spirit, em tasol i rot bilong givim ona na biknem long yu, God Papa, nau na oltaim.

Ol: Amen.

BIKPELA PRE TENKYU 2

Dispela Pre Tenkyu i gat Prefasio bilong em yet. Tasol ol i ken yusim tu wantaim ol arapela prefasio.

Pris: Lord i stap wantaim yupela.

Ol: Na wantaim spirit bilong yu.

Pris: Litimapim hat bilong yupela.

Ol: Mipela i litimapim long Lord.

Pris: Yumi tenkim God, i Lord bilong yumi.

Ol: Em i gutpela na i stret.

Tru, i gutpela na i stret, oltaim na long olgeta ples, mipela i tenkim yu, God Papa, yu strong olgeta na yu stap oltaim. Yes, givim tenkyu long yu em i wok bilong mipela, na em i oraitim mipela long nem bilong Jisas Krais, em i Pikinini bilong yu, yu laikim em tumas.

Jisas em i Tok bilong yu, na long em yu mekim olgeta samting i kamap. Yu salim em i kam bilong oraitim mipela. Holi Spirit i mekim em i kamap man. Maria Virgo i karim em. Jisas i bihainim laik bilong yu, na taim em i karim pen long diwai kros, em i kisim bek mipela, bai mipela i pipel bilong yu. Em i win long indai, na nau mipela inap kirap bek wantaim em. Olsem na wantaim ol ensel na ol santu, mipela i givim tenkyu na ona long yu, na mipela i sing (tok):

Ol: Holi, Holi, Holi Lord, God yu strong olgeta. Heven na graun i pulap long bilas bilong yu. Hosana long God i stap antap. Litimapim nem bilong em i kam long nem bilong Lord. Hosana long God i stap antap.

Pris: Tru tumas, God, yu holi. Yu Papa bilong olgeta samting i holi.

BILONG TINGIM SANDE, *de Krai i kirap long matmat, pris i ken tok:*

Olsem na mipela i kamap long pes bilong yu, na wantaim Sios bilong yu long olgeta hap billong graun. Mipela i singsing amamas long dispela Sande, em i nambawan de bilong wik. Long Ista Sande moning Krai i bin kirap bek long matmat, nay u litimapim em, na givim biknem long em long raithan bilong yu.

(Olgeta pris wantaim)

Mipela i askim yu, long Spirit bilong yu, mekim holi dispela bret na wain, bai tupela i kamap Bodi na Blut bilong Jisas Krai, em i Bikipela bilong mipela.

Pris i mas autim klia na stret ol tok i kamap nau, bai olgeta manmeri i stap long Misa i ken harim gut, na tingim dispela tok i tok bilong Krai yet.

Taim Jisas i laik karim pen, em i kisim bret. Em i tenkim yu, em i brukim bret, em i givim long ol disaipel bilong em, na em i tok:

YUPELA OLGETA, KISIM NA KAIKAI LONG EN. DISPELA EM I BODI BILONG MI. BAI MI GIVIM BILONG ORAITIM YUPELA.

Na long wankain pasin, taim ol i kaikai pinis, Jisas i kisim kap. Em i tenkim yu gen. Em i givim kap long ol disaipel bilong em, na em i tok:

YUPELA OLGETA, KISIM NA DRING LONG EN. DISPELA EM I KAP BILONG BLUT BILONG MI. EM I BLUT BILONG NUPELA KONTRAK I STAP OLTAIM. DISPELA BLUT BAI I LUS BILONG TEKEWE SIN BILONG YUPELA NA BILONG PLANTI MANMERI. YUPELA MEKIM OLSEM BILONG TINGIM MI GEN.

Pris: Nau yumi telimautim bilip bilong yumi.

Ol: Krai, yu dai. Krai, yu kirap bek. Krai, bai yu kam bek gen.

o

Ol: Lord, mipela i tokaut long indai bilong yu, na mipela i autim bilip long kirap bilong yu, inap long taim yu kam bek.

o

Ol: Lord, olgeta taim mipela i kaikai dispela bret, na dring long dispela kap, mipela i telimautim indai bilong yu, inap long taim yu kam bek.

o

Ol: Lord, yu Ridima bilong mipela, yu oraitim mipela pinis long indai na kirap bilong yu. Helpim mipela nau.

(Olgeta Pris wantaim)

Yes, Papa, Jisas i dai na em i kirap bek. Nau mipela i tingim em. Olsem na mipela i ofarim long yu dispela bret i givim laip, na dispela kap i oraitim mipela. Mipela i kisim Bodi na Blut bilong Krai na mipela i pre, bai Holi Spirit i ken mekim mipela olgeta i kamap wan.

(Wanpela pris tasol)

God Papa, tingim Sios bilong yu long olgeta hap bilong graun. Mekim mipela i kamap wanfamili tru, wantaim Pop N., na Bisop N., na olgeta wanwok bilong ol.

Long Misa bilong tingim olmanmeri i dai pinis

God Papa, tingim N., yu singautim em pinis i kam long yu. Long Baptais em i bin dai long sin wantaim Krai. Mekim em i kirap wantaim Krai long laip bilong oltaim.

(Wanpela pris tasol)

Tingim tu ol bratasusa bilong mipela i dai pinis, na ol arapela manmeri i dai bipo na i wet long kirap bek. Bringim ol i go i stap wantaim yu. Mipela i askim yu, Papa, marimari long mipela tu, bai wantaim Santu Maria Virgo, i Mama bilong God, wantaim ol aposel na olgeta santu, mipela i ken bung long laip bilong oltaim, na adorim na litimapim nem bilong yu, long Jisas Krai, em i Pikinini bilong yu.

Em i kisim kalis na plet wantaim hostia na litimapim tupela wantaim, na em i sing (tok):

Pris: Dispela Jisas Krai, long wok bilong Holi Spirit, em tasol i rot bilong givim ona na biknem long yu, God Papa, nan a oltaim.

Ol: Amen.

BIKPELA PRE TENKYU 3

God Papa, yu holi tru. Olgeta samting yu bin mekim kamap, i mas litimapim nem bilong yu. Long wok bilong Jisas Krai, Pikinini bilong yu na Bikpela bilong mipela, na long strong bilong Holi Spirit, yu givim laip long olgeta samting, nay u mekim olgeta samting i kamap holi. Oltaim yu wok long bungim pipel bilong yu, bai long hap san i kamap inap long hap san i go daun ol i gen givim gutpela ofa long yu.

Papa, mipela i askim yu, long Holi Spirit bilong yu, mekim holi dispela bret na wain, mipela i bin bringim olsem ofa bilong kisim blesing, bai tupela i kamap Bodi na BLut bilong Jisas Krai, Pikinini bilong yu na Bikpela bilong mipela. Em yet i tok na mipela i mekim dispela misa.

Pris i mas autim klia na stret ol tok i kamap nau, bai olgeta manmeri i stap long Misa i ken harim gut na tingim dispela tok i tok bilong Krai yet.

Long dispela nait, we ol i givim em long han bilong ol birua, Jisas i kisim bret. Em i tenkim yu, God Papa. Em i brukim bret, em i givim long ol disaipel bilong em, na em i tok:

YUPELA OLGETA, KISIM NA KAIKAI LONG EN. DISPELA EM I BODI BILONG MI. BAI MI GIVIM BILONG ORAITIM YUPELA.

Na long wankain pasin, taim ol i kaikai pinis, Jisas i kisim kap i gat wain. Em i tenkim yu gen. Em i givim kap long ol disaipela bilong em, na em i tok:

YUPELA OLGETA, KISIM NA DRING LONG EN. DISPELA EM I KAP BILONG BLUT BILONG MI. EM I BLUT BILONG NUPELA KONTRAK I STAP OLTAIM. DISPELA BLUT BAI I LUS BILONG TEKEWE SIN BILONG YUPELA NA BILONG PLANTI MANMERI. YUPELA MEKIM OLSEM BILONG TINGIM MI GEN.

Nau pris i sing (tok):

Pris: Nau yumi telimautim bilip bilong yumi.

Ol: Krais, yu dai. Krais, yu kirap bek. Krais, bai yuk am bek gen.

O

Ol: Lord, mipela i tokaut long indai bilong yu, na mipela i autim bilip long kirap bilong yu, inap long taim yuk am bek.

O

Ol: Lord olgeta taim mipela i kaikai dispela bret, na dring long dispela kap, mipela i telimautim indai bilong yu, inap long taim yuk am bek.

O

Ol: Lord, yu Ridima bilong mipela, yu oraitim mipela pinis long indai na kirap bilong yu. Helpim mipela nau.

(olgeta pris wantaim)

God Papa, mipela i tingting long Pikinini bilong yu i karim pen, na i dai bilong kisim bek mipela. Em i kirap, na i go bek long heven. Nau mipela i wet, bai em i kam bek gen. olsem na mipela i givim dispeal ofa long yu bilong tenkim yu.

Lukdaun long ofa bilong Sios, em i ofa bilong Jisas yet. Long indai bilong em, yu gutpela gen long mipela. Strongim mipela long Bodi na Blut bilong Pikinini bilong yu bai mipela i ken pulap tru long Holi Spirit bilong em, na mipela i ken kamap wanpela bodi na wanpela spirit insait long Krais.

(Wanpela pris tasol)

Jisas i ken mekim mipela i stap oltaim gutpela ofa bilon gyu, bai mipela inap long i go insait long bilas bilong yu wantaim ol manmeri yu makim pinis. Wantaim Santu Maria Virgo, i Mama bilong God, wantaim ol aposel na marit, (wantaim Santu N., (ol i ken kolim nem bilong santu i gat pestode bilong em, o wassantu bilong peris nap les.) na olgeta santu. Mipela i bilip, ol i pre biulong helpim mipela oltaim.

(wanpela pris tasol);

God bilong marimari, dispela ofa i ken mekim mipela i kamap wanbel. Nau mipela i askim yu, bai ofa hia i ken stretim tu sindaun bilong olgeta manmeri, na i ken bringim gutpela taim long ogleta hap bilong graun. Strongim bilip na laik bilong Sios bilong yu, emi wokabaut yet long rot. Strongim Pop N., na Bisop N., ol arapela bisop, na olgeta wanwok bilong ol. Strongim olgeta manmeri, Pikinini bilong yu i bin kisim i go insait long lain bilong yu. Gutpela Papa, harim pre bilong famili bilong yu i stap hia. Bungim olgeta pikinini bilong yu bilong olgeta hap bilong graun.

Long Misa bilong daimanmeri pris i ken kisim dispela rpe, sapos em i laik.

Tingim N., yu singautim em i kam pinis long yu. Long Baptais em i bin dai long sin wantaim Krai. Mekim em i kirap wantaim Krai, taim Krai i kirapim bek olgeta manmeri. Mekim dispela bodi, i bin kamap long graun nating bai i ken kamap naispela wankain olsem bodi bilong Krai.

Tingim tu ol manmeri i dai pinis, ol bratasusa bilong mipela, na olgeta manmeri yu laikim, taim ol i lusim dispela graun. Kisim ol i go insait long kingdom bilong yu. Mipela tu i wet, bai mipela i ken bung wantaim ol, na i ken pulap oltaim long amamas bilong yu.

Long Misa bilong daimanmeri pris i ken kisim dispela pre.

Long dispela ples bai i nogat krai na i nogat pen moa. Long wanem, mipela bai i lukim yu tru. Na mipela bai i stap olsem yu, na litimapim nem bilong yu oltaim, oltaim.

Mipela i askim ol dispela samting long nem bilong Krai, em i Bikpela bilong mipela. Long han bilong em yu givim olgeta gutpela samting long mipela.

Em i kisim kalis nap let wantaim hostia na litimapim tupela wantaim, na em i sing (tok):

Pris: Dispela Jisas Krias, long wok bilong Holi Spirit, em tasol i rot bilong givim ona na biknem long yu, God Papa, nau na oltaim.

Ol: Amen.

BIKPELA PRE TENKYU 4

Pris: Lord i stap wantaim yupela.
yu.

Ol: Na wantaim spirit bilong

Pris: Litimapim hat bilong yupela.
Lord.

Ol: Mipela i litimapim long

Pris: Yumi tenkim God, i Lord bilong yumi.

Ol: Em i gutpela na i stret.

Pris: Tru, i gutpela na i stret, mipela i tenkyu long yu, God Papa, yu strong olgeta na yu stap oltaim. Yu God tru, nay u gat laip. Bipo yet na inap oltaim, yu stap long bikpela lait. Yu tasol yu gutpela tru. Yu Papa bilong olgeta samting i gat laip. Yu yet yu mekim olgeta samting i kamap, nay u pulapim olgeta samting long blesing bilong yu. Yu yet yu mekim olgeta samting i amamas long bikpela bilas bilong yu. Ol planti ensel i stap klostu long yu. Ol

i holim wok bilong yu, na ol i amamas long lukim pes bilong yu. Ol i litimapim nem bilong yu, long san na long nait. Olsem na wantiam ol ensel bilong yu, na wantaim olgeta samting bilong heven na bilong graun, mipela tu i laik onarim yu, na mipela i sing (tok):

Holi, Holi, Holi Lord, God yu strong olgeta. Heven na graun i pulap long bilong bilong yu. Hosana long God i stap antap. Litimapim nem bilong em i kam long nem bilong Lord. Hosana long God i stap antap.

(Pris i go pas long Misa i pre)

God Papa, yu bikpela, mipela i litimapim nem bilong yu. Olgeta samting yu bin wokim i soim save na laik bilong yu. Yu bin wokim man na meri olsem piksa bilong yu. Na yu laik, bai ol i lukautim olgeta samting hia long graun,. Yu bin makim ol bilong holim wok bilong yu na bilong bosim olgeta samting yu bin wokim.

Bipo, ol manmeri i bikhet long yu, na ol i no moa pren bilong yu. Tasol yu no bin larim indai i winim ol. Nogat. Yu yet yu bin helpim ol, bai ol inap painim yu gen. planti taim yu laik mekim kontrak wantaim ol, na yu singautim ol long bihainim laik bilong yu. Na yu bin salim ol profet i kam bilong tokim ol, olsem ol i mas wetim Ridima i kam.

God Papa, yu laikim tru olgeta manmeri bilong graun, olsem na long taim yu yet yu makim pinis, yu bin salim Pikinini bilong yu i kam bilong kisim bek mipela. Holi Spirit i mekim em i kamap man. Maria Virgo i karim em. Jisas em i wankain olsem mipela, tasol em i no gat sin. Em i kam bilong autim Gutnius long ol tarangu, na bilong mekim kamap fri ol manmeri i stap kalabus. Na em i kam bilong bringim amamas long ol manmeri i gat hevi.

Jisas i bihainim laik bilong yu, olsem na em i lusim laip bilong em. Em i kirap long indai, na long dispela we em i pinisim indai bilong mipela, na i kamapim nupela laip. Nau mipela i no ken tingting moa long bihainim laik bilong mipela yet. Nogat. Mipela i mas tingting long bihainim laik bilong Jisas tasol. Long wanem, em i dai na i kirap bek bilong kisim bek mipela. Em i go bek long yu, Papa, na em i salim Holi Spirit i kam olsem namba wan presen long ol bilipmanmeri. Na Holi Spirit i mekim wok bilong Jisas i go i go inap long taim olgeta samting i kamap holi.

(Olgeta pris wantaim)

God Papa, mipela i askim yu, dispela Holi Spirit i ken mekim holi dispela bret na wain, bai tupela i kamap Bodi na Blut bilong Jisas Kraiss, em i Bikpela bilong mipela. Jisas yet i givim dispela misa long mipela olsem wanpela kontrak bilong em i stap wantaim mipela inap oltaim.

Pris i mas autim klia na stret ol tok i kamap nau, bai olgeta manmeri i stap long Misa i ken harim gut, na tingim dispela tok i tok bilong Kraiss yet.

Gutpela Papa, taim i kamap pinis, bilong yu givim biknem long Jisas, Pikinini bilong yu. Em i laikim tumas ol manmeri bilong em i stap long dispela graun. Em i laikim ol tru, i go inap long em i dai. Olsem na long taim ol i sindaun long kaikai bilong Pasova, Jisas i kisim bret. Em i tenkim yu. Em i brukim bret, em i givim long ol disaipela bilong em, na em i tok:

YUPELA OLGETA, KISIM NA KAIKAI LONG EN. DISPELA EM I BODI BILONG MI. BAI MI GIVIM BILONG ORAITIM YUPELA.

Na long wankain pasin, Jisas i kisim kap i gat wain. Em i tenkim yu gen. Em i givim kap long ol disaipela bilong em, na em i tok:

YUPELA OLGETA, KISIM NA DRING LONG EN. DISPELA EM I KAP BILONG BLUT BILONG MI. EM I BLUT BILONG NUPELA KONTRAK I STAP OLTAIM. DISPELA BLUT BAI I LUS BILONG TEKEWE SIN BILONG YUPELA NA BILONG PLANTI MANMERI. YUPELA MEKIM OLSEM BILONG TINGIM MI GEN.

Nau pris i sing (tok):

Pris: Nau yumi telimautim bilip bilong yumi.

Ol: Krais, yu dai. Krais, yu kirap bek. Krais, bai yu kam bek gen.

o

Ol: Lord, mipela i tokaut long indai bilong yu, na mipela i autim bilip long kirap bilong yu, inap long taim yu kam bek.

o

Ol: Lord, olgeta taim mipela i kaikai dispela bret, na dring long dispela kap, mipela i telimautim indai bilong yu, inap long taim yuk am bek.

o

Ol: Lord, yu Ridima bilong mipela, yu oraitim mipela pinis long indai na kirap bilong yu. Helpim mipela nau.

(Olgeta pris wantaim)

God Papa, nau mipela i amamas na tingim gen dispela wok bilong kisim bek mipela. Mipela i tingim Krais i dai, na em i go daun long ples bilong ol i dai pinis. Mipela i tok tru, Krais i kirap pinis, na em i kisim biknem long raithna bilong yu. Na mipela i wet, bai em i kam bek gen wantaim bikpela bilas bilong em. Olsem na mipela i givim Bodi na Blut bilong Krais long yu. Dispela ofay u laikim tumas na i kisim bek olgeta manmeri.

God Papa, lukdaun long dispela ofa, yu yet yu bin givim long Sios bilong yu. Mipea i askim yu, Holi Spirit i ken bungim olgeta manmeri i kaikai dispela wanpela bret, na i dring long dispela wanpela kap, bai ol i ken kamap wanpela bodi tasol. Na wantaim Krais ol i ken kamap gutpela ofa bilong litimapim nem bilong yu.

(Wanpela pris tasol)

God Papa, tingim ol dispela manmeri, mipela i laik helpim ol long dispela ofa. Tingim wokman bilong yu, Pop N., na Bisop bilong mipela N., na olgeta arapela bishop, na ol wanwok bilong ol. Tingim ol manmeri i bringim dispela ofa na olgeta manmeri i stap hia long dispela misa.

(Wanpela pris tasol)

Tingim ol manmeri i bin bilip long Krai, nan au ol i dai pinis. Na tingim tu olgeta arapela daimanmeri, yu tasol yu save long bilip bilong ol. Gutpela Papa, kisim mipela i go long heven, bai mipela i ken bung wantaim Santu Maria Virgo, i Mama bilong God, wantaim ol aposel na olgeta santu. Long dispela ples bilong yu bai i nogat sin na i nogat dai moa. Na mipela wantaim olgeta samting yu bin wokim, mipela bai i litimapim nem bilong yu long strong bilong Jisas Krai, em i Bikpela bilong mipela. Long han bilong em, yu givim olgeta gutpela samting long mipela.

Em i kisim kalis na plet wantaim hostia na litimapim tupela wantaim, na em i sing (tok):

Pris: Dispela Jisas Krai, long wok bilong Holi Spirit, em tasol i rot bilong givim ona na biknem long yu, God Papa, nau na oltaim.

Ol: Amen.

LOTU BILONG KISIM KOMUNIO

Pris: Tru, God em i Papa bilong yumi, na yumi pikinini bilong em. Nau yumi pre olsem Jisas yet i skulim yumi:

O

Jisas yet i skulim yumi long kolim God em i Papa bilong yumi. Olsem na yumi inap pre:

O

Yumi askim God Papa, bai em i pogivim ol rong bilong yumi, na bai em i helpim yumi long pogivim ol arapela manmeri i mekim rong long yumi. Na olsem yumi olgeta i pre:

O

Yumi pre, bai lo na pasin bilong God i ken kamap ples klia, na i ken stiaim laik na wok bilong yumi, olsem Jisas i skulim yumi:

Ol: Papa bilong mipela, yu stap long heven. Mekim nem bilong yu i kamap bikpela. Mekim kingdom bilong yu i kam. Strongim mipela long bihainim laik bilong yu long graun, olsem ol i bihainim long heven. Givim mipela kaikai inap long tude. Pogivim rong bilong mipela, olsem mipela i pogivim ol arapela i mekim rong long

mipela. Sambai long mipela long taim bilong traim. Na rausim olgeta samting nogut long mipela.

Pris: God Papa, mipela i pre, tekewe olgeta samting nogut long mipela. Givim gutpela taim long mipela. Na helpim mipela long marimari bilong yu, bai mipela inap long abrusim sin, na bai no gat samting i kem mekim mipela i pret, na paulim tingting bilong mipela. Olsem bai mipela i ken amamas na wetim kambek bilong Jisas Krai, em i Ridim bilong mipela.

Ol: Kingdom na strong na biknem, em i bilong yu tasol, oltaim oltaim.

MAK BILONG BEL ISI: TAIM BILONG SEKAN

Pris: Bikpela, Jisas Krai, bipo yu tok long ol aposel bilong yu, “Bel isi i stap wantaim yupela. Yes, gutpela taim bilong mi, mi givim long yupela.” Mipela i tingim dispela tok bilong yu na mipela i pre, Jisas, marimari long mipela, nay u no ken tingim ol sin bilong mipela. Tingim tasol bilip bilong Sios bilong yu. Givim gutpela taim bilong yu long mipela, na mekim mipela i kamap wanbel tru. Yu Bikpela bilong mipela, nau na oltaim.

Ol: Amen.

Pris: Gutpela taim bilong Lord i stap oltaim wantaim yupela.

Ol: Na wantaim spirit bilong yu.

Diken (Pris): Ol bratasusa, yumi givim mak bilong bel isi long ol bratasusa.

Pris i kisim hostia, i brukim na i putim liklik hap i go long wain, na em i tok:
Dispela Bodi na Blut bilong Jisas Krai, nau mi putim wantaim, i ken givim laip bilong oltaim long yumi, long taim yumi kaikai.

Taim pris i brukim hostia, ol manmeri i ken sing o pre:
**Lem bilong God, yu tekewe sin bilong olgeta manmeri, marimari long mipela,
Lem bilong God, yu tekewe sin bilong olgeta manmeri, marimari long mipela,
Lem bilong God, yu tekewe sin bilong olgeta manmeri, givim gutpela taim long mipela.**

Pris i pasim han i stap, na em i tok isi:
Bikpela, Misas Krai, Pikinini bilong God, long laik bilong God Papa na logn wok bilong Holi Spirit, yu givim nupela laip long ol manmeri bilong graun, taim yu dai long diwai kros. Long dispela Bodi na Blut bilong yu, rausim ol sin bilong mi na olkain samting nogut. Strongim mi, bai mi ken holim tru olgeta tok bilong yu, na bai mi no ken lusim yu.

o

Bikpela, Jisas Krai, mi laik kisim Bodi na Blut bilong yu. Mi bilip, yu laikim olgeta manmeri bilong graun, nay u marimari long ol. Nau mi askim yu, bai

Bodi na BLut bilong yu i no ken bringim mi long kot na mi lus. Nogat. Em i kenmekim gut bodi na sol bilong mi.

Pris: Dispela em i Jisas Krai, Lem bilong God, em i tekewe ol sin bilong olgeta manmeri. Ol manmeri, God i singautim ol long kaikai bilong em, ol i ken amamas.

Ol: Lord, mi no inap, bai yu kam insait long haus bilong mi. Yu tok tasol na sol bilong mi i orait.

Pris: Bodi bilong Krai i ken bringim mi long laip bilong oltaim.

Pris: Blut bilong Krai i ken bringim mi long laip bilong oltaim.

Pris i kisim plet o kalis wantaim hostia na i go long ol lain i laik kisim komunio. Em i soim Bodi bilong Krai long wan wan i laik kisim komunio, na em i tok:

Pris: Bodi bilong Krai. Man o meri i kisim komunio i bekim: Amen.

Pris (diken) i soim kalis long wan wan, na em i tok:

Pris: Blut bilong Krai. Man o meri i kisim komunio i bekim: Amen.

Sapos pris i givim bret na wain wantaim, em i tok:

Pris: Bodi na blut bilong Krai.

Taim pris o diken i klinim plet na kap, em i mekim pre olsem:

God Papa, dispela Bodi na Blut bilong Krai, mipela i kaikai pinis, i ken stretim pasin na tingting bilong mipela na i ken givim laip bilong oltaim long mipela.

PRE BIHAIN LONG KOMUNO

Pris: Yumi pre:

Ol: Amen.

PINIS BILONG MISA

Sapos i gat sampela toksave, ol i ken mekim nau. Pris i blesim ol manmeri na em i tok:

Pris: Lord i stap wantaim yupela.

Ol: Na wantaim spirit bilong yu.

A:

Pris: God i strong olgeta, i ken blesim yupela, Papa, na Pikinini, na Holi Spirit.

Ol: Amen.

B: BIKPELA BLESING

Diken: Ol bratasusa, yupela daunim het bilong yupela, na yupela pre, bai God i ken blesim yupela.

Pris: God i strong olgeta, i ken blesim yupela, Papa, na Pikinini, na Holi Spirit.

Ol: Amen.

o

Pris: Na blesing bilong God i strong olgeta, Bikpela blesing bilong Papa, na bilong Pikinini, na bilong Holi Spirit, i ken i kam daun long yupela, na i ken i stap wantaim yupela, nau na oltaim.

Ol: Amen

Sapos bisop i mekim misa, em i tok:

Bisop: Lord i stap wantaim yupela.

Ol: Na wantaim spirit bilong yu.

Bisop: Litimapim nem bilong Bikpela.

Ol: Nau na oltaim.

Bisop: Helpim bilong yumi i kam long Bikpela.

Ol: Em i mekim kamap heven na graun.

Bisop i kisim stik wasman, (sapos em i laik), na i tok:

God i strong olgeta, i ken blesim yupela, Papa, na Pikinini, na Holi Spirit.

Ol: Amen.

SALIM OL I GO

Bihain diken, o pris yet, i pasim han na em i tok:

Diken/Pris: Yupela i go misa i pinis.

Ol: Yumi tenkim God.

o

Diken/Pris: Yupela go, na wokabaut wantaim pasin bel isi.

Ol: Yumi tenkim God.

o

Diken/Pris: Bel isi bilong Kraus i stap wantaim yupela, na yupela i go mekim wok bilong God.

Ol: Yumi tenkim God.

Nau pris i givim kis long alta, olsem em i bin mekim taim misa i kirap. Pris wantaim ol lain bilong helpim em long lotu i daunim het na ol i go.